



**Agencija za ravnopravnost spolova BiH Ministarstva za ljudska prava i izbjeglice Bosne i Hercegovine objavljuje:**

**JAVNI POZIV**

za dostavljanje ponuda za konsultantske usluge u okviru projekta  
**Finansijski instrument za provedbu Gender akcionog plana Bosne i Hercegovine (FIGAP II)**

**Naziv pozicije: Konsultant/ica za pružanje usluge izrade analize na temu: COVID-19 pandemija – kao izazov za ljudsku sigurnost iz perspektive ravnopravnosti spolova.**

**Uvod**

Agencija za ravnopravnost spolova Bosne i Hercegovine, Ministarstva za ljudska prava i izbjeglice BiH, u saradnji sa Gender Centrom Federacije Bosne i Hercegovine i Gender centrom Republike Srpske, izradila je Finansijski instrument za provedbu Gender akcionog plana Bosne i Hercegovine -FIGAP II (2018 – 2021), kako bi osigurala sredstva za provedbu Gender akcionog plana Bosne i Hercegovine (2018-2022). Cilj FIGAP II Programa je da osigura finansijsku podršku institucijama Bosne i Hercegovine, Republike Srpske i Federacije Bosne i Hercegovine za provođenje aktivnosti kojima se teži unaprijeđenju socio-ekonomskih uslova za muškarce i žene, djevojčice i dječake u Bosni i Hercegovini, a u skladu sa Zakonom o ravnopravnosti spolova u BiH. Finansijsku podršku za provođenje Programa FIGAP II osigurala je Švedska agencija za međunarodni razvoj i saradnju (Sida) putem Posebnog sporazuma za podršku provođenju Programa FIGAP II potpisanog sa Ministarstvom za ljudska prava i izbjeglice Bosne i Hercegovine.

U okviru Programa FIGAP II planirana su sredstva za podršku Agenciji za ravnopravnost spolova Bosne i Hercegovine/MLJPI BiH u svrhu obilježavanja 20-godišnjice Rezolucije Ujedinjenih nacija 1325 „Žene, mir i sigurnost“. Ova aktivnost će biti realizovana u skladu sa važećim Akcionim planom za provođenje UN Rezolucije 1325 “Žene, mir i sigurnost” u Bosni i Hercegovini za period 2018-2022. godine.

Agencija za ravnopravnost spolova/MLJPI koordinira sa relevantnim institucijama i organizacijama u BiH kako bi se uspostavila koordinirana i sinhronizirana akcija obilježavanja godišnjice ove rezolucije. Između ostalih aktivnosti, a i zbog potrebe da se pitanja koja se odnose na „Žene, mir i sigurnost“ posmatraju i kontekstu aktuelne krize izazvane pandemijom koronavirusa, planirana je izrada analize na temu: COVID-19 pandemija – kao izazov za ljudsku sigurnost iz perspektive ravnopravnosti spolova. Cilj je rasvijetliti uticaj pandemije na različite sigurnosne aspekte života građana i građanki u BiH uzimajući u obzir različite, uloge, potrebe i interese žena i muškaraca u ovoj vanrednoj situaciji. Analiza bi poslužila i kao dokument za diskusiju na planiranom regionalnom on-line forumu koji će biti održan u sklopu obilježavanja godišnjice Rezolucije Vijeća sigurnosti UN-a 1325 “Žene, mir i sigurnost” (UN Rezolucije 1325).

S tim ciljem planiran je angažman konsultanta/konsultantice za izradu analize na temu: COVID-19 pandemija – kao izazov za ljudsku sigurnost iz perspektive ravnopravnosti spolova.

## Opis zadatka

Od konsultanta/ice se očekuje sljedeće:

- > Izrada metodologije i strukture analize i usaglašavanje istih sa Agencijom za ravnopravnost spolova BiH Ministarstva za ljudska prava i izbjeglice BiH
- > Pregled recentnih znanstvenih, strateških, pravnih i drugih dokumenata (domaćih i međunarodnih) o sljedećim temama:
  - o Koncept ljudske sigurnosti
  - o Ljudska sigurnost iz perspektive ravnopravnosti spolova, uključujući aktuelne i nadolazeće sigurnosne prijetnje i izazove
  - o Refleksija na pitanje ljudske sigurnosti u akcionim planovima za provođenje UN Rezolucije 1325 „Žene, mir i sigurnost“ u BiH sa primjerima konkretnih akcija - lokalizacija UN Rezolucije 1325 i dr.
  - o COVID-19 pandemija kao pitanje ljudske sigurnosti - multidimenzionalni sigurnosni aspekt (uključujući i aspekt ravnopravnosti spolova)
  - o Akcioni plan za implementaciju UN Rezolucije 1325 u BiH kao platforma za djelovanje i poduzimanje konkretnih akcija na sprječavanju posljedica pandemije
- > Intervjui sa ključnim predstavnicima institucija i nevladinih organizacija zastupljenih u Koordinacionom odboru za nadzor nad provođenjem Akcionog plana za implementaciju UNSCR 1325 (max 5 osoba)
- > Izrada finalne analize uz usvajanje prethodnih komentara i sugestija Agencije za ravnopravnost spolova BiH/MLJPI
- > Asistencija u pripremi koncepta regionalnog on-line foruma stručnjaka/inja na temu: COVID -19 pandemija - rodni aspekti sigurnosnih izazova za populaciju i moderiranje istim
- > Izvještaj sa regionalnog on-line foruma

## Uslovi angažmana

Konsultant/ica će biti angažiran/a na osnovu ugovora o djelu. Sjedište konsultanta/ice je Agencija za ravnopravnost spolova BiH Ministarstva za ljudska prava i izbjeglice BiH u Sarajevu. Na ovaj javni poziv se mogu prijaviti konsultanti/ice iz Bosne i Hercegovine. Obračun naknade za pružene usluge će se vršiti na osnovu broja dana angažmana. Okvirni period angažmana je 25 ekspert-dana.

## Kvalifikacije konsultanta/ice

Kvalifikacione:

- Univerzitetska diploma iz oblasti društvenih nauka
- Najmanje pet godina iskustva u radu sa institucionalnim mehanizmima za ravnopravnost spolova u Bosni i Hercegovini, posebno u oblasti implementacije UN Rezolucije 1325 “Žene, mir i sigurnost”
- Najmanje pet godina relevantnog analitičko-istraživačkog iskustva sa objavljenim publikacijama

Poželjne:

- Prethodno iskustvo u izradi analiza, izvještaja ili drugih dokumenata koji se odnose na oblast “Žene, mir i sigurnost”
- Poznavanje međunarodnih dokumenata i pravne regulative u oblasti ravnopravnosti spolova i ljudskih prava, posebno onih koji se odnose na “rod i sigurnost”
- Izražene komunikacijske i analitičke vještine



- Spremnost na timski rad i saradnju sa svim akterima

### Način apliciranja

Ako ispunjavate gore navedene uvjete potrebno je da svoju ponudu dostavite na sljedeću adresu:

**Ministarstvo za ljudska prava i izbjeglice BiH**  
**Agencija za ravnopravnost spolova BiH**  
**Dubrovačka 6,**  
**71000 Sarajevo**

ili putem elektronske pošte na adresu [protokol.ARSBiH@mhr.gov.ba](mailto:protokol.ARSBiH@mhr.gov.ba) sa naznakom „za javni poziv – COVID-19 pandemija – kao izazov za ljudsku sigurnost iz perspektive ravnopravnosti spolova”.

Ponuda mora sadržavati: kratko prateće pismo (do 1000 riječi), biografiju kandidata/kinje i prijedlog plana i vremenske dinamike rada, sa naznačenim okvirnim prijedlogom metodologije i strukture analize.

### Rok za predaju ponude

Rok za predaju ponude je 15 dana od dana objavljivanja javnog poziva u sredstvima informisanja.

Broj: 10-37-2-1625/20

Datum: 26.08.2020

